



Sesida dals

Communitgà ils

Protocol nr.

24 d'avust 2020

27 d'avust 2020

691

Dumonda Jochum

concernent digitalisaziun, homeoffice, decentralisaziun

Resposta da la Regenza

Tar la dumonda 1: Durant la crisa da corona è la lavur da chasa anora vegnida resguardada cun in focus spezial en il rom dal management da la cuntinuitad da las fatschentas (business continuity management, BCM). Sco mesira per cumbatter cunter il coronavirus (COVID-19) aveva la Regenza ordinà cun ils conclus dals 13 da mars e dals 22 d'avrigl 2020 (prot. nr. 179 e 340) da far homeoffice tar l'administraziun chantunala, nua che quai è pussaivel e raschunaivel. Entaifer fitg curt temp ha pudì vegnir messa a disposiziun l'infrastructura tecnica necessaria.

Tras la mesira da lavurar da chasa anora, ordinada da la Regenza, hai pudì vegnir garantì ch'ils process d'importanza centrala per las burgaisas ed ils burgais han pudì vegnir liquidads da tut temp senza restricziuns durant la crisa da corona.

Tar la dumonda 2: Numerus posts da servetsch han fatg oravant tut u per part homeoffice per dumagnar la crisa da corona. Tar l'administraziun chantunala eran en funcziun passa 1000 apparats mobils, e dapi la crisa da corona è vegnids endrizzads circa 1100 access remote supplementars cun computers privats. 2520 collavuraturas e collavuratur han gì la pussaivladad tecnica da lavurar da chasa anora, a medem temp han mintgamai bundant 1000 collavuraturas e collavuratur fatg mintga di homeoffice. L'infrastructura ch'è vegnida messa a disposiziun da l'Uffizi d'informatica ha funcziunà senza problems durant l'entira perioda. Er sesidas han ultra da quai gì lieu ad interim mo pli en moda virtuala. Bleras unitads administrativas han pudì "digitalisar" svelt ils process decisivs, uschia ch'igl è stà pussaivel da far homeoffice quasi senza palpìri. Suentar ils emprims pass da schluccada dal Cussegl federal mez

matg han anc ca. 500 collavuraturas e collavurats fatg diever da l'access da chasa anora.

Las sfidas las pli grondas èn stadas quellas da metter a disposiziun entaifer fitg curt temp l'infrastructura tecnica (hardware, licenzas, dimensiuns, capacitads), da digitalisar a curta vista ils process che vegnivan liquidads fin lura sin palpiri (p.ex. scannar la posta) e da qualifitgar las collavuraturas ed ils collavurats d'utilisar la tecnica en moda effizienta (conferenzas da telefon e da video; metter a disposiziun infurmaziuns detagliadas en l'intranet e realisar scolaziuns online). Plinavant èn vegnids priorisads ils process e là, nua che quai è stà pussaivel, èsi vegnì desistì da contact direct cun la clientella resp. èsi vegnì midà ad interim a contact per telefon.

Tar la dumonda 3: En il program da la Regenza 2021 – 2024 (guardar er missiva dals 29 d'october 2019, carnet nr. 8 / 2019 – 2020, p. 432) ha la Regenza fixà che la lingua rumantscha e taliana sco er la cultura grischuna duain vegnir mantegnidas cun sustegnair differentas mesiras en il sector da la furmaziun, da l'administraziun, da las mesiras e da la transformaziun digitala. Er per la diversità dal Grischun è l'urbanisaziun decentrala fitg impurtanta. Las cundiziuns generalas necessarias duain vegnir meglieradas, per che quella possia vegnir garantida er a lunga vista. Far homeoffice porscha er l'avantatg che las collavuraturas ed ils collavurats pon abitar en lieus periferics e na ston betg pendular mintga di.

Tar la dumonda 4: La Regenza ha l'intenziun da reglar e d'implementar bainbaud homeoffice e lavur mobila sco furmas da lavur tar l'administraziun chantunala. Ella è persuadida da prestar uschia ina contribuziun a favur da l'urbanisaziun decentrala e da mantegnair qua tras plazzas da lavur en lieus periferics.



En num da la Regenza

Il president:

Dr. Chr. Rathgeb

Il cancellier:

Daniel Spadin